

光緒順天府志

藝文志四

光緒順天府志一百

順天人著述三

江陰繆荃孫纂

國朝

杜立德太傅詩選一卷

存

立德事蹟詳先賢傳劉正宗序其詩云杜子詩時而誼重嚶鳴則停雲諸什不足喻其篤摯也時而憂深民事則絲穀諸語不足寫其懇惻也時而登臨嘯咏攬物興思發抒懷抱則楊柳梧桐之句不足肖其光霽摹其冲夷也華而不靡廉而不劓跌宕而不佻激玉潤珠明規圓矩折杜子之詩其杜子之人乎則其詩亦可想見矣

趙士通易圖說

佚

士通明徵之父精於易學者稱潛夫先生見王士正趙明徵墓志銘

孫承澤孔易

存

承澤事蹟詳先賢傳承澤以大象疏卦畫彖傳附彖爻傳附爻名曰孔易胡世安序之以行自序云余十年山居日抱一易初集朱子之說著易宗既而思之夫子一生學易至章編三絕今觀夫子十翼以大象釋義皇之卦畫以彖傳釋文王之卦辭以小象釋周公之爻辭其所釋或卽三聖之意而釋之或推三聖之意而釋之或一釋不已再四以釋之或略加虛字詠嘆以釋之易固無不盡之旨於是專取夫子之易以求三聖之旨夫子

之旨有難明者細爲詮釋覺從前紛紜之論可以省除因成孔
易一書西蜀胡菊潭先生見而稱善時菊潭著易史刻成因作
一序欲併行之余不敢也罄此餘生之力以從事於此焉耳

尙書集解二十卷

存

承澤是書以蔡沈集傳爲主參以呂祖謙書說金履祥表注許
謙叢說而力斥馬融鄭康成志在力尊宋學采書序弁每篇之
首以補蔡傳之缺又以蔡傳考證失真者如璿璣之璿玉也誤
以爲珠簡潔二河也誤以爲一洪範一篇有禹之經有箕子之
傳乃俱以爲箕子之言此其失之大者皆或補或糾不爲苟同
惟篤信古文獨異於朱子耳

九州山水考三卷

存

是書取禹貢所載山水分類相從山凡四十有三正導者二十有七雜見者十有六水凡四十有二正導者九雜見者三十有三附以澤九原隰十冠以水道會通源委皆首標其名而以所合諸水旁行斜貫引以烏絲略似族譜世系與地圖之式迥殊中多附論時事引明代諸人議論事實以相證佐如水利海運之類與經義多不相關蓋借事抒議不專爲注經設也

洪範經傳集義一卷

存

是書分禹疇箕傳以一五行以下爲禹疇以水曰濶下以下爲箕傳如五紀皇極五福六極等傳大約多依宋元諸儒惟三八政向無傳取朝鮮本實之朱彝尊嘗卽以親見朝鮮本否承澤

曰未也仁山金氏言之今仁山注無此文或承澤所見本異耳
詩經朱傳翼三十卷

存

承澤取小序與朱子之說並立每篇之首定其是非又就集傳
略爲推衍以暢其旨然詆毛氏之罪謂不在王輔嗣下毛氏較
齊魯韓三家詩最醇故獨傳其亦何罪之有此由尊朱子之過
也未免失言矣

周禮舉要二卷

存

見承澤五經翼中

春秋程傳補二十卷

存

是書桓公九年以前全載程傳十年以後以經說補之經說所
無採諸說補之中取諸新安汪克寬纂疏者居多纂疏卽明代
春秋大全所本其書堅守胡安國傳則仍胡氏之門戶而已未
必盡當程子意也又所補諸傳皆不出姓氏於原文亦多所更
改其桓公九年以前程子無傳者亦爲補之則是自爲一書特
託名於程子耳

五經翼二十卷

存

是編雜取前人諸經序跋論說以類相次得易四卷書二卷詩
四卷春秋六卷禮記二卷餘杭嚴沆益以承澤所著周禮舉要
二卷共爲一編刊之其書採摭未備不及朱彝尊經義考之淹
洽其自序云曩時海內藏書家稱泚中西亭王孫予官泚時西

亭已歿與其孫永之善因得盡窺其遺籍約十萬餘卷尤重經學中多秘本世所鮮見子雖困頓簿書日借其經學一類課兒輩鈔錄之攜歸京師壬午河決王孫之書盡沈洪流中賴子家猶存其什一至甲申之變子家玉鳧堂積書七萬餘卷一時星散無復片紙存者是歲秋冬僵卧城東魚藻池上書買荷書來售多予家故本封識宛然泣焉欲涕又中祕故藏狼藉於市間質衣物收之病廢之餘獨取諸書有裨經學者或錄序跋或錄論說久之成帙數年以來朝焉夕焉饑當食寒當衣孤當友病當藥石者惟此是賴禹航嚴子顯亭省母南還別子退谷因託而梓之以公同志

畿輔人物志二十卷

存

是書專志有明一代畿輔人物

四朝人物略六卷

存

是書自漢至唐宋爲五卷全襲名臣錄之文明一代總爲一卷皆用劉孟雷所爲翊運碩輔名卿正學等傳爲之

畿輔仙釋志

未見

見日下舊聞攷所引

益智錄二十卷

存

是書自周迄明凡聖賢名人言行可錄者詮次爲二十卷而載明人事居三之一間有敘事之後附以論斷者承澤崇禎庚午

鄉試出姚希孟之門辛未會試出何如寵之門其附東林也甚力故爲萬厯天啟間諸人傳尤詳

山書十八卷

佚

見銷燬書目所錄皆明季雜事

典制紀略十五冊

未見

雜記古今法制名物多援引經史及百家之說而著其原委焉

天府廣記四十四卷

詳紀錄順天事之書

學典三十卷

存

是書所載皆歷代建學設官行禮講學科舉之事自虞迄明分

年編載惟前代僅居八卷而明代之事多至二十二卷如釋奠之禮凡各史志紀所載者皆未收入既載國子監學興廢創置而各朝學官之職學官之制又皆闕焉至泮宮習射及各經列於學官者如漢之石經唐之寫經石經後唐之鈐版卷中皆未言及而明代一切章疏毫無關於學典者乃一概濫入所以明代獨多也

聞者軒帖考一卷

存

是編所記自蘭亭而下至文徵明之停雲館帖三十有八種一考其源流品其次第書成於順治丁亥在庚子銷夏記之前故所記互有詳略

藤陰劄記

存

是編爲承澤講學之語共一百餘條大抵以程朱爲宗而深詆金谿姚江亦頗涉及史事

學約

未見

承澤輯周程張朱之言爲一編

學約續編十四卷

存

是編又以明薛瑄胡居仁羅欽順高攀龍四家之語仿近思錄之例訂爲一集以續之

考正晚年定論二卷

存

是書以王守仁所作朱子晚年定論不言晚年始於何年但取偶然謙抑之詞或隨問而答之語及早年與人之筆錄特欲借朱子之言以攻朱子不足爲據乃取朱子年譜行狀文集語類等書詳爲考正以宋孝宗淳熙甲午爲始朱子是時年四十有五其後乃始與陸九淵兄弟相會以次逐年編輯實無一言合於陸氏亦無一字涉於自悔因逐條辨駁輯爲是編考晚年定論初出之時羅淇先致書守仁所辨何叔京黃直卿二書已極爲明析是書特申而明之大旨固不出羅書之外

明辨錄

存

是書取諸儒闢佛之言彙載成帙上卷載昌黎原道及佛骨表而傳奕疏及太宗斥蕭瑀詔轉列於後其餘辨論陸九淵楊簡

王守仁之說者亦備記之下冊則皆諸儒語錄辨駁佛氏之學者

庚子銷夏記八卷

存 鮑氏知不足齋刻本 翻鮑本

是編乃順治十六年承澤退居後所作始自四月迄於六月故以銷夏爲名自一卷至三卷皆所藏晉唐至明書畫真蹟四卷至七卷皆古石刻每條先標其名而各評隲於其下八卷爲寓目記則皆他人所藏而曾爲承澤所見者故別爲一卷附之抵議論之中間有考據如宋之錢時嘗爲祕閣校勘史館檢閱終於江東帥屬本傳所載甚明而承澤以爲隱居不仕此類亦頗失於檢點然其鑒裁精審敘次雅潔猶有米芾黃長睿之遺風視董道之文筆晦澀者實爲勝之存目別有研山齋墨蹟集

覽一卷法書集覽一卷卽此書之藁本也

春明夢餘錄七十卷

存 古香齋刊本 粵東翻刻本

是書首以京師建置形勝城池幾甸次以城防官殿壇廟次以官署終以名蹟寺廟石刻巖麓川渠陵園似乎地志而敘沿革者甚略分列官署似乎官制每門多列明代章疏連篇累牘又似乎故事頗乖體例然於明代舊聞採摭頗悉一朝掌故實多賴是書以存且多取自實錄邸報與稗官野史據傳聞而著書者究爲不同故考勝國之軼事者多取資於是編焉

退谷隨筆

未見

見

四庫總目孫炯硯山齋珍玩集覽提要

己亥存案一卷

存

此編乃承澤順治己亥解官退居時所作

王世德崇禎遺錄一卷

存鈔本

世德事蹟詳先賢傳錄中多記思陵善政如罷蘇杭織造毀錦衣衛非刑散逐玉熙宮伶人革僉商采辦之例內侍高采請開珠池立時誅死以及召見羣臣命太子侍立大旱詣中正殿曝日中跪禱多他記錄所未及又言宮人有夫人牌子常在有大答應小答應上皆正色以臨一無戲語卽田貴妃婉惠得上意未幾被譴退居啟祥宮以憂死又玉熙宮乃伶人所居非離宮

也卽娛情聲色不必親幸以斥吳祭酒永和官詞琵琶行之謬
又謂內帑竭於天啟兵興以來取累朝銀器用輸局融冶以充
餉上有銀作局三字人所共見也錢糧解承運庫者有二金花
銀以供后妃金花宮中賞賚輕齎銀以爲勳戚及京衛武臣俸
祿其時皆無餘資此外甲字等十庫貯方物天財庫貯錢古今
通集庫貯書畫符券誥命東裕庫貯珍寶外東裕庫亦貯方物
皆無金銀也庫盡此矣以辨野史謂城破時大內尙有積金十
餘庫之妄皆職在禁中親所聞見宜可據信其於亡國舊君惻
款忠愛之意尤足尙焉又言內操教場名振武殿在北安門內
迤西而非萬歲山三月十八日開廣安門迎賊者爲煙閣所居
同人其獻太子二王於賊者爲太監栗宗周王之俊皆足以資
攷證

馮銓獨漉山房詩草

未見

銓事蹟詳雜人傳此書見涿州吳志

雷□□孝經廣訓

未見

毛奇齡序云北平雷徵君著大意以朱子爲宗

王崇簡冬夜箋記

存

崇簡事蹟詳先賢傳是錄成於康熙乙巳皆其隨筆劄記之語
所述格言多先儒名論亦間摘錄古事及同時耳目所見聞然
徵引舊籍皆不載其出典亦或偶然記憶未真如伯夷叔齊姓
名一條云出呂氏春秋及韓詩外傳今二書並無此文案論語

疏所引乃出春秋少陽篇也

青箱堂文集三十三卷詩集三十二卷

存

刊本

崇簡練習掌故文皆雍容爾雅詩集編年爲次始於天啟丙寅迄於

國朝康熙戊午則朱琬所刪定也

劉餘祐燕香齋文集四卷詩集八卷

存

餘祐事蹟詳先賢傳是集爲其子芳喆所編每篇篇末皆有評語如坊刻時文之類後附行略

李孔昭秋壑吟一卷

存

孔昭事蹟見先賢傳孔昭愛陶詩晚自號潛翁跡其出處與靖節同詩格亦摹擬惟肖

金鎮清美堂詩集

未見

鎮事蹟詳先賢傳此集見陶樸齋輔詩傳七

王景祚用拙山房草

佚

景祚事蹟詳先賢傳此書見吳正治撰傳

劉瑞遠勤榮堂集八十一卷

存
刊本

瑞遠字端伯號頓齋三河人順治乙酉舉人官至江南海州知

州

頓齋權稿

存刊本

見三河陳志

方玉集

存刊本

見同上

胡兆龍息游堂詩集

未見

兆龍事蹟詳先賢傳此集見畿輔詩傳五

王熙文靖集二十四卷附錄一卷

存刊本

熙事蹟詳先賢傳是集爲其子克昌所編凡奏疏二卷頌賦一

卷詩六卷文十五卷以自作年譜及行狀誌銘碑傳附錄於末
前有其門人張玉書吳震方二序又有朱彝尊序

郝惟訥恭定奏議五卷

存

惟訥事蹟詳先賢傳是集凡都察院奏疏八篇刑部奏疏五篇
禮部奏疏一篇戶部奏疏九篇吏部奏疏六篇其禮部請行釋
奠疏戶部稅銀款目疏皆註疏存部案字蓋當時同官公議而
惟訥具草故仍刻之私集也

袁懋功滇記二十三卷

未見

懋功事蹟詳先賢傳此書爲懋功巡撫雲南時所輯

張能麟詩經傳說取裁十二卷

存

能鱗字西山順天人順治丁亥進士官至四川按察司副使其書以豐坊僞詩傳爲主而旁採申培詩說及詩六帖以發明之宗旨先謬其餘亦不足深詰矣

峨眉志略一卷

存

能鱗曾任川南道因志之山舊有牛心石能鱗改曰洗心於峨眉形勝古蹟標撮甚略末附詩文數篇而自作乃登其二佛光解一篇命意雖善措詞則未能免俗也

儒家理要二十九卷

存

刊本

多采宋五子遺書分類編錄周子二卷張子六卷程子六卷朱

子十五卷書前各有小序一首本傳一篇中有正學論朱陸異同說並緒言主敬論皆能鱗已說也浙江采輯遺書目作十五卷

西山集九卷

存

是集凡文八卷詩一卷能鱗善談理學其詩文多率爾操觚體裁未盡合於古

羅森麻姑山丹霞洞天志十七卷

存

森事蹟詳鑒誠傳是編因明萬厯中左宗郢志而修第一卷爲圖者八第二卷爲攷者四第三卷爲表者二第四卷爲志者四第五卷爲紀者五其餘藝文分七卷末則麻源附錄一卷從姑

附錄一卷育英堂附錄一卷姑山雜記一卷詩文補遺一卷

胡繼芳易經講義一卷

佚

繼芳字生華號淡雲三河人順治丁亥明通進士官至常州府同知

晚香堂詩集

佚

見三河陳志

謝泰蓼集編

存

泰事蹟詳先賢傳此書見畿輔詩傳八

客中吟

存

見同上

張宏儼竹香堂稿

存

宏儼字容侯宛平人順治八年舉人

趙吉徵菜根堂詩卷

存

吉徵事蹟詳先賢傳王士正序之云先生爲人慷慨負意氣好交游重然諾其詩不取妍當時而翫辭之氣時露行墨間

紀元卧游山房稿

未見

元事蹟詳先賢傳此書見畿輔詩傳十三

劉芳躅留雲山房集

未見

芳躅事蹟詳先賢傳此書見涿州吳志

馮源濟恰宜樓詩

未見

源濟事蹟詳方技傳此書見涿州吳志

許世昌西巡奏議

未見

世昌事蹟詳先賢傳此書見宛平王志

王應徵廣嗣篇

存

應徵字心白宛平人崇禎辛巳歲貢此書見宛平王志

日省錄

存

見同上

米壽都吉士詩集

存

壽都事蹟詳先賢傳王崇簡序其詩云吉士韶齡英穎傳其家學揮毫落紙所謂高山樗具蒼佩華纓有廊廟之容焉旣而海內多故歌板蕩傷大東欬歔感慨之音作矣迄於今悲激悽閔纏綿引抑亦其發於情之不得已乎

查日乾春秋臆說二卷

佚

日乾事蹟詳先賢傳此書見查氏譜

史腴二卷

佚

見同上

僧德寶南北集

佚

德寶事蹟詳釋道傳此書見宛平王志

井在讞語八卷

未見

在事蹟詳先賢傳此書見黃叔琳青溪先生傳

講約六諭解一卷

佚

見同上

天文纂要八卷

佚

見同上

簾蟬集四卷

存

見畿輔詩傳十二

合河署詩集一卷

未見

在補興縣時所作詩興卽唐河東道嵐州之合河縣也

鐵潭詩文集八卷

存

共詩六卷文二卷見畿輔詩傳十三

黃鸝鵲詩紅梨花詩落花詩各一卷

佚

見黃叔琳撰傳

蔣宏道采仲軒詩草

存

宏道字裕庵大興人順治十六年進士歷官都察院左副都御

史

劉芳喆拙翁庸語

未見

芳喆事蹟詳先賢傳此書見涿州吳志

戊辰偶筆

未見

見同上

贅言

未見

見同上

拙翁集

未見

見同上

蘇崱圯上吟

存

喟字依巖大興人順治十八年進士

劉文韶攬蕙堂偶存

存

文炤字雪舫宛平人明孝純皇太后之姪新樂忠恪侯文炳弟
文炳全家殉難文炤流落江表竟死高郵詩亦感時遭變慨歎
淋漓不自知其言之悲也

梁以樟印否集

未見

以樟字公林號鵠民大興人應澤子明進士官河南商邱縣知
縣按題名碑以樟爲清苑人畿輔詩傳謂清苑縣志不爲列傳
蓋以樟乃應澤子大興人而非清苑題名碑不應有誤或寄籍
清苑而仍仕大興故大興志有而清苑無也

史可程浮叟詩集

未見

可程字赤豹號蘧庵大興人可法弟明進士官翰林院庶吉士

韓昌天樵子集

未見

昌字經正號石耕大興人靜志居詩話石耕善琴所操北音恥作妮妮兒女子語終身不再娶游覽江湖以終今之牧犢子也五律清穩頗足名家

辛民辛子詩集

存

民字霜翊又字先民一字嚴公宛平人

劉獻庭廣陽雜記五卷

存 功順堂叢書本

獻庭事蹟詳先賢傳獻庭之學主於經世於天官地理六書九數農田水利刑名錢穀陣伍壬遁無所不通其所爲書均未成

沒後弟子黃宗夏掇拾此記畧存其讀書著書之概

張崇德恆嶽志三卷

存

崇德字懋修順天人官渾源州知州北嶽恆山在渾源州城南二十里自漢以後皆祠於上曲陽

國朝順治十七年以刑科都給事粘本盛之請改祠於渾源州部議令山西撫司官吏詳察恆山遺蹟於時主其說者禮部尙書王崇簡疏載所著青箱堂集中據紳耆之議以上達者卽崇德也故輯斯志於祀典特詳曲陽飛石之僞亦辨之甚悉

胡介社谷園詩集

存

介社字循齋號茨邨宛平人以父蔭厯官河南按察使毛奇齡

稱其詩宗太白摩詰而得其正者

陳襄容堂詩

存

襄字若水號思庵文安人協兄官福建知府

何天寵紫來閣集

存

天寵字昭侯號素園宛平人康熙六年進士官吏部員外郎

井鑑半學山房詩鈔

存

鑑字待庵文安人康熙八年舉人官山海衛教授屢廷儀序其詩云待庵先生品誼純粹學術宏博包羅今古寄興吟詠瀟灑
淡宕音節和平風人之旨溢於絃管

方峨嵎雪集

存

峨字嵎雪一字玉巖大興人康熙廿一年舉人官江西新建縣知縣

邵瑣情田詞三卷

存

初名宏魁字柯亭大興人康熙己卯舉人官新河縣教諭遷山東昌邑知縣其填詞之學出於朱彝尊此集乃乾隆癸酉其子履嘉所刊也

苑瀛珊詩古文四卷

未見

瀛珊事蹟詳先賢傳此書載寶坻洪志

賈鉉賈氏族譜

存

鉉事蹟詳先賢傳按私譜例所不載然賈氏之書傳自金元章學誠謂其詳贈有體鉉修於前鉉子澎復補於後子孫奕葉不忘家學修志乘者得以取裁世家大族尙其鑒諸

米漢雯漫園詩集

未見

漢雯事蹟詳先賢傳此集見畿輔詩傳

始存集

未見

見同上

張烈讀易日鈔六卷

存

烈事蹟詳先賢傳是書一以朱子本義爲宗謂易者象也言有盡象無窮伏羲畫爲奇偶再倍而三因重而六爻周逐卦繫彖逐畫繫爻全是假物取象不言理不指事而萬事萬理畢具大旨在因象設事就事陳理猶說易家之不支蔓者前有其子益孫升孫紀實云此稿已刪潤四十餘過至易簣前數日尙合蒙引通典存疑諸書考訂知來藏往二義旋加改補云云則其用力亦可謂勤矣

王學質疑一卷附錄一卷

存

是書攻擊姚江之學凡分五篇一辨性卽理之說一辨致知格物之說一辨知行合一之說一爲雜論一爲總論其附錄則首

爲朱陸異同論次爲史法質疑通論史體次爲讀史質疑五篇
一論明孝宗時閹宦之勢一論李東陽之巧宦一論宋史以外
不當濫立道學傳亦爲王學而發一論王守仁宜入功臣傳而
以明之亂亡全歸罪於守仁一論萬厯時爭東官挺擊諸臣之
非當王學極濫之日其補偏救弊亦不爲無功然以明之亡國
歸罪守仁未免鍛鍊周內夫明之亡亡於門戶門戶始於朋黨
朋黨始於講學講學則始於東林東林始於楊時其學不出王
氏也獨以王氏爲禍本恐宗姚江者亦有詞矣門戶之見未除
則愈論議愈生支節夫亦可以不必矣

攷堂文集二卷

存

烈篤守朱子之說故集中多講學之文然如朱陸異同論王學

質疑皆未免有鍛鍊周內之意不及其賈董同異論之持平蓋漢學但有傳經之支派各守師說而已宋學既爭門戶則不得不百計以求勝亦勢之不得不然者歟

紀艮桂山堂集八卷

存

艮事蹟詳先賢傳艮轍跡半天下所至皆有題詠故詩集甚富
有王企靖序

何林彌年集

存

林字雲壑宛平人歷官揚州鹽運使

陳寅主一堂集

存

寅字靖共大興人官知州鄧漢威詩觀云使君慷慨英華詩高逸不羣

楊自牧潛齋軒稿

存

自牧事蹟詳先賢傳詩觀稱自牧詩英悍得邊塞之氣居多

許維祚六雪齋詩草

存

維祚字石園順天人

曹廣端初暘集

存

廣端字子正號玉淵大興人

曹廣憲石倉集

存

廣憲字思原號梅峯大興人

李曉梧臺集

存

曉字寅清宛平人

鄧林升雪江草

存

林尹字虞山宛平人

王潔幽居山房稿

存

潔字汲公大興人

米漢倬尚書輯要

佚

漢倬事蹟詳先賢傳此書見宛平王志

墨飲齋詩

佚

見同上

寄草亭詩集

佚

見同上

井焜示兒詒六卷

佚

焜事蹟詳先賢傳此書見傳山白衣山人傳

古文奇字一卷

佚

見同上

左傳各鈔四卷

佚

見同上

袖中簡一卷

佚

見同上

文安志二十卷

詳紀載順天事之者

遺詩二十卷

係

見文安楊志

幽貞賦一卷

佚

見同上

幽貞達旨一卷

佚

見同上

王源讀易通言五卷

存

源以易先後天河洛之說出於道家與胡先生渭之言若合符節而著此書以辨之方苞撰傳以爲十卷

或庵評春秋三卷

存

是書本名文章練要分六宗百家六宗以左傳爲首百家以公羊傳穀梁傳爲首然六宗僅左傳有評百家亦惟評公羊穀梁二傳而已

輿圖指掌

存

是書先以總論後分京省而每省亦各有總論以冠其端九邊卽附於北直山陝之後江防海防之要並詳於沿江沿海各省總論之中其於諸郡獨載建置沿革疆域形勝屬邑山川他若宮室人物無關於形勢者皆不錄而古人行事有足以證其地之輕重者皆附載焉又按其方域遠近山川要害皆畫爲圖

顏先生年譜

存

源取李塏所輯顏博野年譜稍易體例間有增益以成此篇

兵法要略二十二卷

存

分上中下三篇上篇則孫子諸家之說刈其繁而存其要用兵之方略也中篇則東伍營陳操練之方形名器甲之用車騎水陸接刃合戰攻城守壘之法也下篇則自春秋以迄於元古人用兵之往事也源後見武備志又擇其簡要適用爲昔所不及載者錄爲二卷附於中篇下篇之後曰補遺

平書十篇三卷

存鈔本

十篇者一曰分民二曰分土三曰建官四曰取士五曰制田六曰武備七曰財用八曰河淮九曰刑罰十曰禮樂爲文十有五

首分上中下三卷

居業堂文集二十四卷

存 武進管繩萊刊本 叢輔叢書本

源少作皆縱橫捭闔近於戰國策後從方苞游所作益堅剛雋永根柢於管荀脫化於曾王雖未能與苞抗行而亦如驂之靳矣

朱璘毛詩補音

佚

璘字卜年號毅庵歲貢好學寒暑不輟爲文博雅尤工古詩旁通天文地理音律此書見通州高志

離騷注釋

佚

見同上

郭應元座右箴銘

佚

應元字乾一通州人陝西長安縣知縣此書見通州高志

蘊香集

佚

見同上

關中吟

佚

見同上

黃叔琳硯北易鈔十二卷

存

叔琳事蹟詳先賢傳是編用注疏本以程傳本義爲主雜采諸說附益之

宋元周易解附易解別錄

存

其書仿李鼎祚周易集解之例但哀諸說不加論斷然所采錄頗簡且書名旣題宋元而書中復錄子夏易傳語十數條未免失於斷限又宋時說易者如王湜易學林至易裨傳鄭汝諧易翼傳趙汝樸易敍叢書林光世水邨易鏡之類傳於世者尙多茲皆未錄而元人說易者竟未采一家其書未分卷帙亦無序目殆猶未成之本也後附易解別錄一冊竝旁采異說亦僅有宋而無元云

詩統說三十二卷

存

是編雜採諸家詩說分類鈔錄所抵頗爲繁富十四卷以前皆總論詩之綱領十五卷以後乃依經文次第而論之不列經文惟集衆說故以統說爲名云

周禮節訓六卷

存

是編名曰節訓蓋節錄而訓釋之也經文旣非完本所輯註文亦皆不著名氏

夏小正注一卷

存

夏小正一書原載大戴禮中自隋志別爲一卷宋傅崧卿始分別經傳而爲之注朱子沿用其例稍加考定附於儀禮經傳通

解中而未言所本元金履祥亦未見傅氏之書遂以爲朱子舊
本採附通鑑前編夏禹元年下而句爲之注與傳頗有異同
國朝濟陽張爾岐合輯傳注爲一編附以己說叔琳以傳注多相
重複乃汰其繁蕪以成是注亦以己說附之其稱傳者大戴禮
之文其稱注者履祥之說注中稱張氏曰者爾岐說稱案者叔
琳說也其中如改種黍菽麋作菽麋而下菽麋作菽麋鹿人從
引易卽鹿從禽丹鳥白鳥不主螢火蝙蝠及蚊蚋之說以匿爲
蟬以納卵蒜爲二物皆與舊說不同

宋元春秋解

存

是編雜採宋元諸家之說而不加論斷前有總論凡例亦皆採
集舊文

史通訓故補二十卷

存

是書補王維儉註所未及與浦起龍史通通釋同時而成而此本之出略前故起龍亦間摭用所稱北平本者卽此書也此本註釋不及起龍而不甚改竄猶屬謹嚴惟起龍於知幾原書多所回護卽疑古惑經之類亦不以爲非此書頗有糾正差爲勝之

硯北雜錄

存

是書上至天文地理下至昆蟲草木凡經史所載旁及稗官小說據其所見各爲採錄亦間附以己意大抵主於由博返約以爲考據之資

硯北叢錄

未見

是編卷首有魏兆龍序稱爲叔琳巡撫浙江時罷官之後所偶錄皆雜採唐宋元明及近時說部亦益以耳目所聞見大抵多文人嘲戲之詞如諧史笑林之類或著出處或不著出處爲例不一亦未分卷帙蓋憂患之中借以遣日而已

文心雕龍輯註十卷

存

考宋史藝文志有辛處信文心雕龍註十卷其書不傳明梅慶生註麤具梗概多所未備叔琳因其舊本重爲刪補以成此編崔恂徽垣吟

未見

恂事蹟詳先賢傳此書見儲在文撰傳

紀遵宜式倫堂集

存

遵宜字毅亭文安人康熙三十三年進士歷官吏科給事中

王煥憶雪樓集一卷

存
刊本

煥事蹟詳先賢傳所著有田盤紀游蜀裝蘆中澗上秋山嶮衝
遊并鄉前後寫憂及還庚諸集行世毛際可序云原本情性胞
與民物萃數十年之精力出入于漢魏六朝唐宋元明間而語
必已出求其一字之摹仿不可得朱彝尊序云詩自漢魏六朝
唐之初盛中晚下及宋元明人體製靡所不合其用情也摯斯
溫柔敦厚之教生焉紅豆樹館詩話云子千吟嘯林麓放情山

水家近田盤而羅浮豐湖又在其所治郊坰之內其登二山也
皆撝奇剔險窮極幽杳故其田盤羅浮二卷紀游二卷酷似蘇
道元水經注而荔支詞七絕一卷尤爲膾炙人口其他佳句如
朝游五岳雲生展夜度三江月入瓢人歸市冷愁藏虎畫靜簾
開好放蠅能詩易白愁中髮無酒難朱鏡裏顏苦茗力能消夢
境濁醪理可化愁城急補殘書如療疾細嘗佳釀當還鄉曲中
易顧周公瑾琴外難逢鍾子期憤深精衛思填海遇蹇牽牛恨
隔河脰下猶羞與噲伍禪中豈屑共伶居昔人所謂筆有餘力
詞無竭源子千有焉

王師旦文廟備攷

未見

師旦字叔萃歲貢生官客城訓導此書見寶坻洪志

南華注

未見

見宿河關志

年齒譜

未見

見同上

文集

未見

甯河關志云其寓海上時門人劉源崔體乾崔瑞麟存其語錄三十篇寶而藏之學者稱曰盤峰先生

淑萃詩集

未見

見畿輔詩傳二十六

楊大年蘅香草

存

大年名允長以字行薊州人布衣寶坻洪志云大年漁陽詩人
遨遊山水間情往興來蒼茫欲絕爲一時名流所咨賞朱秀水
日下舊聞王新城古歡錄往往採之

陳祥裔蜀都碎事六卷

存

祥裔本姓喬氏號藕漁順天人康熙中官成都府督捕通判採
蜀中故實爲碎事四卷雜引諸書或註或否間附以考證按語
及前代題詠詩文復以所採未盡別爲藝文二卷謂之補遺祥
裔所自作詩亦併列於唐宋名作之間

王兆符文集

未見

兆符源子康熙三十九年進士方望溪云兆符所排纂周官及詩文若干卷蔣君湘帆編而錄之

紀暹宜五芝樓集

存

暹宜字廷亮號鈍翁文安人昆子康熙四十四年舉人官景州學正

芮復傳衣亭詩草一卷

存

復傳事蹟詳先賢傳紅豆樹館詩話云衣亭天才倚明學有本原官錢塘時屢司分校所得皆知名士嚴海珊遂成其一也舊

仿南宗骨格蒼秀句如游法螺寺云松老身生甲風多響似潮
登江樓懷王仲宣云擇木有心纔去魏委身何事更依劉感懷
云癡能玩世原非傲清可傳家豈患貧岳陽樓云朱絃夜鼓湘
盤瑟錦纜晴看楚客舟皆有逸氣

查爲仁游盤日記

未見

爲仁事蹟詳先賢傳

花影庵雜記

未見

爲仁居獄中就白雲司葺板屋數間讀書其中榜曰花影庵所
記皆讀書有得之語

蔗塘未定稿六卷外集八卷

存

查慎行序其詩云猶子心數從患難中發憤讀書所爲詩多與古人相頡頏而出之宛轉蘊之遙深庶幾香草美人共成千古陳鵬年序云蓮坡承其家學當險阻萬難時輒以詩寫其鬱勃見之者咸以爲懣蓮坡獨能處窘而平之含毫泐慮雖凜凜懷霜神明自勝其詩藹然廓然非涵養至深曷克致此

絕妙好詞箋七卷附錄二卷

存 查氏刊本 錢塘徐稱刊本 會稽章氏刊本

爲仁與錢塘厲鶚同撰絕妙好辭宋周密所編於南宋詞家去取最善爲仁采摭諸書以爲之箋各詳其里居出處或因詞而攷證其本事或因人而附載其佚聞以及諸家評論之語與其人之名篇秀句不見於此集者咸附錄之會鶚亦方箋此集尙

未脫橐適遊天津見爲仁所箋遂舉以付之刪復補漏合爲一
書宋詞多不標題讀者每不詳其事如陸淞之瑞鶴仙韓元吉
之水龍吟辛棄疾之祝英臺近尹煥之唐多令楊恢之二郎神
非參以他書得其原委有不解爲何語者其疏通證明之功亦
有不可泯者矣

詩餘紀事

佚

見鴈鷗絕妙好詞箋序

蓮坡詩話二卷

存 查氏刊本

刊於絕妙好詞箋之後

查爲義集堂詩鈔

未見

爲義字集堂宛平人爲仁弟歷官淮南儀所監掣通判工畫蘭
竹花卉

黃叔璥南征紀程

存

叔璥事蹟詳先賢傳是編乃其爲監察御史時巡視臺灣自京
師至閩所記始於康熙後壬寅正月而迄於是年六月分日記
載

臺海使槎錄八卷

存

茲編乃康熙壬寅叔璥爲御史時巡視臺灣所作故以使槎爲
名凡分三子目卷一至卷四爲赤嵌筆談卷五至卷七爲番俗

六攷卷八爲番俗雜記臺灣自康熙癸亥始入版圖諸書紀載或疎略不備或傳聞失真叔璣哀輯諸書參以目見以成此書於山川風土民俗物產言之頗詳而於攻守險隘控制機宜及海道風信亦皆一一究悉於諸番情勢尤爲賅備

南臺舊聞十六卷

存

是書詳述御史典故凡十三門每事各注所出之書頗爲詳備其曰南臺者據王世禎分甘餘話今都察院可稱南臺不可稱西臺語也

中州金石攷八卷

存

是書叔璣官河南開歸道時所輯成於乾隆辛酉所錄中州金

石自商周以至元明蒐採頗富然旣以十府三州分目則疆域井然不容牽漏而邠縣蘇軾蜀岡詩石刻第八卷內乃兩收之未免失檢又所載金石皆不著其存亡卽如自序中明言漢碑祇存其七而所載漢時金石乃至百二十種則是據前人所述概爲錄入其中重刻者傳疑者又不盡著其由來殊非記實之意又每種之下宜一一具載立石年月撰書人姓名其不可攷者則著其闕文方足徵信而是書或著或否則體例亦未盡一至於郡縣地名古今沿革之殊或前人著錄稱某碑在某州縣而今改其名者亦宜疏明以資考核如石梁今已爲縣而稱徐庶母碑在州城東之類尤端委未明是皆由輯書時未嘗親見原碑或據金石舊書或據郡縣諸志故也

廣字義三卷

存

宋陳普作字義凡一百五十三字孫承澤嘗爲增訂叔璚復取
陳伯北溪字義及程達原字訓合承澤所訂裒爲一書每條之
首題原字者普之舊題廣義者皆續增也

近思錄集注

佚

見先正事略

慎終約編

佚

見同上

旣倦錄

佚

見同上

程可式來山堂詩鈔八卷

存

可式字松邨香河人康熙五十年舉人官河南河內縣知縣沈
青崖序之云松邨先生蚤入藝林甫冠登賢書連不得志於有
司與余同纂古今圖書集成十年散館後余改官西清越二年
先生亦特擢舍人奉使西蜀事竣授河南縣令所蒞有聲未幾
歸田丁卯冬晤於梁園乃增嵩雲涉江東野三集其志趣所尙
情隨境遷性與理洽施之於館閣政教間適書籍瀏覽誰曰不
宜

舒大成試墨齋詩集

存

大成字子展宛平人康熙五十一年進士官翰林院檢討沈德潛云大成五言應得力於唐賢三昧風味近劉賡虛不能用多能用少也

紀邁宜儉書堂集十二卷

存

邁宜字偁亭文安人康熙五十三年舉人官山東泰安州知州紀昀序其詩云偁亭伯少有大志功名氣節皆不欲居古人下而遭逢坎壈所往輒窮抑鬱憂愁一寫於詩上薄風騷下躋宋元無一不闢其奧

陳儀毛詩臆評

未見

儀事蹟詳先賢傳此書見符曾所撰家傳

鄉黨私記

未見

見同上

學庸私記

未見

見同上

直隸河渠志一卷

存

是編卽儀經理營田時作所列凡海河衛河白河淀河東淀永定河清河會同河中淀河西淀趙北口子牙河千里長隄滹沱河滏陽河甯晉泊大陸澤鳳河牯牛河窩頭河鮑邱河薊河還鄉河塌河淀七里海二十五水皆洪流巨浸也儀本土人又曾

身預水利諸事於一切水勢地形知之較悉故數陳利病之議多而攷證沿革之文少錄而存之亦足以參攷梗概也

南華經解

未見

見家傳

廣前定錄

未見

見同上

天游錄

未見

見同上

蘭雪堂集十八卷

存

于辰序云先生自爲童子時已崇本力學卓然自命凡經史子集之編濂洛關閩之學天文地志河渠樂律之要兵刑錢穀之詳坐而言起而行者靡勿瞭如指掌而後以醞釀深厚者發爲文章則先生之重於天下者不徒以文而其文之所以卓卓可傳者亦要不外於是也

陳學士文鈔一卷

存

此編皆議論直隸治水之文爲吳邦慶別鈔彙入畿輔水利叢書者

賈澎耕餘集

存

澎事蹟詳先賢傳永清周志稱其記序論說文采斐然雖未得會通古人希風作者要其命意立志矯矯不同於流俗

姜順龍采鹿堂詩稿四卷

存

順龍字見田號麟玉保定人康熙五十六年舉人歷官四川按察使

于振紳愛萱齋詩草

未見

振紳字扶青號壽亭宛平人康熙五十年舉人官蔚州學正

胡捷讀書軒集

未見

捷字象三大興人諸生有讀書軒集蓮坡詩話云象三幼有神

童名十歲能詩文與余同硯席者三十年其詩清潤和婉時出性靈

紀恆藤花書屋詩草

存

恆字任甫號北峰文安人遼宜子諸生

紀遼宜蘭蕤集八卷

存

遼宜事蹟詳先賢傳紅豆樹館詩話云可亭爲桂山徵君猶子兩宰劇邑政事之餘吟咏弗倦蓋得於家學者居多佳句五言如仙霞嶺云氣通閩海關勢壓越山尊獨樹挂殘雪亂鴉爭夕陽路盤山百轉雲擁樹千重風翻鴉背雪石響馬蹄冰七言如倦懷想負丁年未隻影吟殘丙夜鏗金骨未成辭碧落朱顏易

老涸緇塵算來身世誰能了說到名場我欲愁宿火香溫知夜
永隔窗竹響覺秋多酒難撥悶辭三雅夢擬游仙隔一塵蝶抱
夜香和露墜燕銜春色過牆飛隔水共邨通路約依山結屋盡
樓臺溪閣岸頭鳩婦雨江船帆腳鯉魚風皆超詣流暢使人讀
之往復流連不能自己

閒雲詞一卷

存

達宜最工倚聲名言側見橫出言盡而意不盡

陳浩文集一卷

未見

浩事蹟詳先賢傳此書見昌平新志

生香書屋詩集六卷

佚

詩五百餘首各體皆工陶冶性靈不卑不亢清剛雋上卓然名家

恩光集一卷

存

賦頌詩三體合編皆應

制之作

楚帆集

存

浩王申典試南行所作

鍾晚祭禮纂三卷

未見

晚事蹟詳先賢傳此書見王芑孫鍾先生事狀

春秋義疏

未見

見同上

春秋比事

未見

見同上

經說

未見

見同上

陳鳳友素齋詩

存

鳳友號鶴汀文安人雍正二年進士官廣東肇慶府知府

王祚禎音韻清濁鑑三卷

存

祚禎字楚珍大興人是書以金韓道昭五音集韻元劉鑑切字玉鑰匙與周德清中原音韻合爲一書而以己意竄改之夫道昭書配三十六母鑑書配內外十六攝德清書則北曲之譜以入聲配入三聲祚禎既狃於方音併四聲爲三混淆古法而乃屑屑然區分門目辨別等次非今非古非曲譜非等韻莫喻其意將安取

孫炯研山齋珍玩集覽

存

炯字挈庵大興人承澤孫是書取退谷隨筆中所論銅玉磁器

及筆墨硯紙石章文玩與刻板繡繪刻絲之屬益以炯所見聞編成此集炯自爲序其中論刻板一條稱其家有宋板本草綱目四函攷本草綱目乃明萬厯中李世珍所作安得有宋板也馬瀚唐句分韻初集四卷二集四卷續集四卷四集五卷

存

瀚字炎洲順天人其書以唐人詩句分一百七韻編次以爲集句之用初集二集兼取五言七言續集四集則惟取七言

張璿大學典祀彙考十四卷

存

璿字玉衡宛平人官國子監典簿是書自孔子而下四配十哲以及先賢先儒凡祀於大學者悉裒其言行各爲之傳然意在務博多失詳考如子夏易傳子貢詩傳皆後人僞作而引作事

實槩無辨正又歷代祀典如金石錄所載後魏太和元年立孔子廟延興四年太上皇帝祭孔子文之類皆佚不錄元設管句一官見元文類歐陽元序準此書附註百石史卒碑例亦所當收是亦不免於疎漏也

紀邁宜返吳吟

存

邁宜字碩亭文安人雍正二年舉人朱桓序云碩亭詩興酣落筆未嘗求工而襟懷瀟灑自有出塵之想

張如鈺蘭谷詩草

存

如鈺字彝伯號蘭谷宛平人雍正四年舉人官武邑教諭

張冲之素修堂詩鈔

存

冲之字道淵號退園宛平人雍正六年賢良方正歷官河南南汝光道

何琇樵香小記二卷

存 守山閣本

琇事蹟詳先賢傳是編皆考證之文凡一百二十條論經義者居其大半亦頗及字學韻學其論六書頗與舊說異同如謂禿字當從禾會意說文謂人伏禾下固屬謬妄卽六書正譌改爲從木諧聲亦非確論謂說文訓爲字爲母猴本末倒置當是先有爲字乃借以名猴謂射字從身從寸爲繡文象手持弓形之譌其說皆未免於獨創至其解春秋西狩獲麟解周禮奔者不禁解詩野有死麇亦時能發先儒所未發其學問大旨蓋出入

於閭若璩顧炎武朱彝尊毛奇齡諸家故多演其緒論云

邵大業讀易偶存十四卷

存

大業字厚庵大興人雍正十二年進士官江南徐州府知府此書於漢儒家言不取其卦氣之說於宋儒家言不取其卦變之圖大旨與平庵翫辭雲峰通釋爲近

謙受堂集十二卷

存

見畿輔叢書

李錯原易三卷

未見

錯事蹟詳僑寓傳此書見通州高志

春秋通義十八卷

未見

見同上

尚史七十卷

存

康熙中鄒平馬驥作釋史採摭百家雜說上起鴻荒下迄秦代仿袁樞紀事本末之體各立標題以類編次凡所徵引悉錄原文雖若不相屬而實有端緒錯是編以驥書爲橐本而離析其文爲之翦裁連絡改爲紀傳之體作世系圖一卷本紀六卷世家十五卷列傳五十八卷繫六卷表六卷志十四卷序傳一卷仍於每段之下各註所出書名其遺文瑣事不入正文者則以類附註於句下蓋體例準諸史記而排纂之法則仿路史而小

變之自序謂始事於雍正庚戌卒業於乾隆乙丑閱十六載而後就其用力頗勤攷古來漁獵百家勒爲一史實始於司馬遷今觀史記諸篇其出遷自撰者率經緯分明疎密得當操縱變化惟意所如而其雜採諸書以成文者非唯事蹟異同時相牴牾亦往往點竄補綴不能隱斧鑿之痕知鎔鑄衆說之難也此書一用舊文剪裁排比使事迹連屬語意貫通體如詩家之集句於厯代史家特爲創格較鎔鑄衆說爲尤難雖運掉或不自如組織或不盡密亦可云有條不紊矣至於晉逸民傳中列杜黃狼暉鉏麀提彌明靈輒逆臣傳中列趙穿而不列趙盾亂臣傳中列卻芮瑕呂飴甥嬖臣傳中列頭須魯列女傳中列施氏婦子奪多所未允又諸國公子皆別立傳而魯宋蔡曹莒邾六國則雜列諸臣中叛臣傳中如巫狐庸叛楚入吳吳楚兩見公

山不狃叛魯入吳吳魯兩見己爲重出而屈巫見於楚不見於晉苗賁皇見於晉不見於楚又復自亂其例如斯之類不一而足亦未能一一精覈固不必爲之曲諱焉

曉巢詩前集後集

存 前集知通州杜甲刊後集知寶坻縣洪肇林刊

錯詩風格不凡如唐人中最近儲王韋柳

江蘭社詩

未見

錯開江蘭社重葺宋史此編錄當時同人唱和之作

廌雅

未見

見通州高志

菊譜

未見

見同上

安鶴超結蘭吟

存

鶴超原名繩祖字曠仙號容溪昌平人寓居通州家徒壁立處之晏如時鐵嶺李錯亦寓通設江蘭社校讎宋史月一會同社者權古吟詩鶴超慕錯名造其門執弟子禮錯亦快得良友唱酬甚富然所存不過什一曰結蘭吟易簀時命其子以遺稿屬州孝廉馮維維其素契也維屬靜海元克莊序其詩付梓行世

華陽吳祖椿校